



16

T 5344/4512







安陽集卷第四十五

哈佛大學漢和
圖書館珍藏

宋司徒太師侍中上柱國尚書令忠獻魏王韓琦著
明少傅兼太子太傅吏部尚書武英殿大學士郭朴校

挽辭

章獻明肅皇太后挽詞二首

一紀裨鴻化千齡從列僊至仁高協帝厚德遠
參乾驗寡親嘗藥恩深欲報天為殫臣庶淚朝
雨助潸然

璿駕方修祀金波忽墜空悲歌傳薤露祕殿聞
椒風霧重昏軒曜雲悽泣舜瞳仙輿邈何在天

外藥珠宮

章懿皇太后挽詞二首

外族傳仙系中閨著德容瑞符衣履玉懿範史
編彤天闕雲埋仗秋高露泣松宸心望歸駕滄
海晦三峯

夢日推祥舊儀坤講禮新帝親無及養天意此
何仁宮寢延蒿月禱諭寓洛塵欲知仁主孝淚
血送龍輜

章惠皇太后挽詞二首

椒掖遺芳在龜臺別信空舊恩緣服重新廟見

慈同殘月無多夜餘花一向風徽音從此斷忍
顧洛川東

柔順符坤德興居監女箴笥衣裙有練殿璧帶
無金外族疏恩薄中宸結愛深宮娥齊飲淚誰
副祝延心

仁宗皇帝挽詞三首

道久民胥化幾先慮極深勤邦循禹度傳聖得
堯心生德齊天地仁聲振古今三山神藥在滄
海信空沉

薄葬定隣邊民安即舊廛大非容六馬深不錮

三泉忍逐宮車出，翻隨玉輅旋。西都無限竹，淚色似湘川。

聖治方無事，仙遊遽不還。心休黃屋外，鄉遠白雲間。笳鼓悽寒月，旌旗卷暮關。孤臣期得殉，黃鳥願重刪。

英宗皇帝挽詞三首

遽委飛乾運，應開山震符。子房批鳳尾，天已下龍胡。過密思堯治，謳歌啓舜圖。只留勤儉德，千古亘三無。

此日天無色，輜車下禁宸。悲風隨去仗，哀淚裊

行塵。一閉皇堂夜，長閑御寢春。守陵來有幾，誰索慶寧人。

蜃駕雖停洛，颯輿已溯天。空藏軒劍舄，不改霸山川。挽揭秋聲外，旌翻夕照前。老臣非從死，何路答知憐。

司徒侍中杜公挽詞三首

早退輕高位，孤風振昔賢。上思終不已，民望日依然。榮寵三增秩，優游十換年。請看良史舊，德孰似公全。

直道當年梗，清名萬世師。身閑心在國，跡退德

高時警絕新詩雅飛騰老筆竒歸休何所樂持
此造希夷

哲人何永逝天理此難忱子謹新遺札家無舊
賜金可傳清白業未足太平心訃至悲尤動
年顧遇深

僕射王公挽詞三首

早冠廉良選尋專翰墨盟上知在直道人愛是
純誠樞極權無撓台衡論必平嗚呼今已矣天
不為蒼生

公昔魁多士予時託後塵交因荷心照義實過

天倫進始欣連茹官終愧積薪牙絃茲遂絕不
見賞音人

相府陪高議於時適共榮開懷敘疇昔協力冀
登平幾日違言笑何期隔死生寢門長慟後追
愴不勝情

張汝士寺丞挽詞二首

昔與君游者芝蘭久更芳高懷澄水月和氣燠
春陽陳迹川流遠嘉名歲景長平生歐尹友嘗
嘆善人亡

滿腹康時業丁年未一伸方從中洛掾俄掩北

邛塵有子賢荀里登科感孟鄰新阡伊闕下長
得塞門春

塞門地名

江西提點刑獄閩隴郎中挽詞一首

昔忝中山帥君時佐郡條協心圖治俗同勝喜
為僚方卜門容駟俄驚坐賦鴉新阡思一慟西
蜀柰迢遙

致政王子融侍郎挽詞三首

公昔求還事年猶未縱心軒裳輕俗累水月瑩
禪襟樂任荒三徑閑時戲一禽陶然踰五閨已
矣世同欽

伯氏勲名永繇公左右然賢碑求帝篆行錄廣
時傳餘範光門法遺文彙史編欲知天報厚五
福賜吾全

昔貳淄川政嘗依太守賢于門欽世德阮巷忝
親照僕始慙當軸公方遂引年音容俄永隔披
泣望新阡

太尉侍中宋公挽詞三首

科等魁髦彥文章壓縉紳大權更將相優寵極
人臣還事至一品享年踰七旬請看今與昔誰
可望公隣

仁皇求治始公出冠儒英仕路知卿相時名獨
弟兄兩朝推重德當世服純誠身後傳家者群
書但滿籩

注想尊元老云亡歎哲人恤章隆上袞哀輓出
中宸史入經綸迹文藏造化神笳簫陽翟路行
者亦霑巾

蘇洵員外挽詞二首

未延宣室文嘗薦子虛書方就綿蕪莫已致
故國悲雲棧央游負石渠名儒升用晚厚

族本西州望來爲上國光文章追典誥議論
皇王美德驚埋玉瓌材痛壞梁時名誰可嗣父
子盡賢良

太尉呂公挽詞二首

韋平傳慶裔方召起隆名塞上天聲遠帷中廟
筭精聚期調玉鉉時忽喪金城朝野悲何甚邦
家重老成

要劇更中外幾微照古今嘉謀增國重和氣入
人深龍已須雲起星俄向壘沉得名非得壽天
報此難忱

安陽集卷第四十五

太子太傅吏部尚書武英殿大學士郭朴

錄附鼓城府君墓誌石本序

閱家集見真定主簿張度所撰四代祖鼓城府君墓銘知曾祖令公於晉天福中葬府君於趙州贊皇縣太平鄉之北馬村然值五代之亂天下以兵相戕賊常趙並邊復有北胡之患子孫避地多故於歲時灑掃薦奠蓋不能及歷祀

既遠遂忘所在琦自塵祥仕深惟祖考塋域之
重極意崇葺而念府君之葬幸知其州縣鄉里
之名雖距今百有餘年苟得上人之耆舊可倚
者使周訪之則萬一可識茲志未遂不敢懈心
嘉祐三年冬偶故吏鄭嗣宗者自東川宰行服
歸趙過都請見問其所居則曰贊皇之邑外也
問北馬則曰所居之隣村也遂以府君墳墓託
之嗣宗去不數月馳來告曰北馬有古塚巋然
至人至今呼爲韓評事墓乃遣男忠彥與指使
直李延慶同往視之且使祭而告曰若非開

隧視銘則無以取衆之信祭已擇日開隧先是
聞于邑至日令尉偕至與夫近村之老幼婦女
環而觀者數千人纔及墓則張度所爲誌石在
焉門頗朽缺自外窺之壙中一皆安然無所動
壁之丹牖尚若新塗繪者忠彥即出誌石示於
衆皆驚呼嗟異令尉閱其文亦相與欣歎爲忠
彥質亟具墨蠟傳其本置石於故處而實其隧
中墳旁地繚以垣牆樹以松柏得嗣宗之甥彭
昂者主守之意祖先之葬百餘年矣數世已忘
其所在一旦求而得之復內外完固無少犯者

實吾先積慶之感而舉世稀闕之事也石本比
家集舊文有少刪略處蓋曾祖令公削其煩也
舊文闕六代之代祖之諱今皆得之謹錄而載
於家集府君誌文之後俾子孫傳之知吾奉事
祖宗之勤賢者必能過吾勤而不肖者亦當師
吾勤而自勉也

錄載五代祖庶子并其二弟墓誌序

琦之五代祖庶子而上世葬于博野縣蠡吾鄉
之北原庶子生祠部與鼓城府君鼓城生永濟
永濟始自北原徙鼓城與夫人張氏葬

趙州贊皇縣太平鄉之北馬村後之子孫奔走
薄官故於蠡吾之塋省視不能及天聖中三兄
司封任群牧判官有鄉貢進士韓可者自博野
起舉來京師與司封兄相過從且敘宗派慶曆
八年琦知定州而可之子弁亦來請見稱從姪
問其祖系相承之次第不能悉也而可之父子
復未嘗一語及先塋之所在嘉祐三年琦既得
鼓城之墳於北馬再嚴封樹且念庶子之塋雖
年祀尤遠苟訪之勤亦當得之會故吏國子博
士劉覲通判永寧遂以茲託已而得覲書言弁

嘗補葺舊塋得二誌文一諱文操并以墳圖來
示詳二誌所載三代則皆庶子之親弟也八年
春遣男忠彥走蠡吾以詳辨之一墳處諸塋之
西北最大而高忠彥思若神感謂衆人曰此當
是吾庶子之塋也於是祭而開墳及晡得其誌
石視之果然衆大嗟異而庶子塋嘗爲暴水所
侵內甚沮洳遠祖諸塋皆又失治完遂一新
崇葺事具重修五代祖塋域記噫琦以區區奉
親之志而獲天之報也數矣其所以答天之意
者惟奉事先世益加其勤至於瞑目而後已耳

吾子孫輩視吾奉親之志如此而獲天之報
此可無動心而思繼者哉今錄庶子與其二弟
誌文附于家集以永其傳云鼓城誌文曾祖登
州錄事參軍當云諱沛而書以高祖沂州司戶
府君之名者當時填諱之誤也謹序

重修五代祖塋域記

唐鎮冀深趙等州節度判官朝議郎檢校太子
左庶子兼御史中丞賜紫金魚袋諱又賓琦之
五代祖也初庶子以博學高節晦道不仕而鎮
帥太傅王紹鼎雅知其名屢加禮辟庶子不得

已而起補節度副記室事紹鼎卒其子太尉常
山王景崇襲有父鎮益尊禮庶子奏授節度掌
書記時巢賊犯闕僖宗幸劔南景崇率定帥王
處存合隣道兵入關進討關輔以平皆庶子謀
也景崇卒其子太師鎔幼嗣父位府事一咨于
庶子以義結隣帥內尊王室朝廷嘉之故恩命
累及以光啓二年八月十四日終于鎮府立義
坊之私第年七十有五庶子曾祖諱肱沂州司
戶參軍祖諱沛登州錄事參軍父諱全隱居不
仕自隱居而上世葬深州博野蠶吾鄉之北

博野今爲永寧軍庶子以龍紀元年十月十五
日復附葬于先塋夫人崔氏棣州司馬魯之長
女婦道母訓爲世儀法終于大復二年七月十
九日年八十有三其年八月十七日歸附于庶
子生二子長諱定辭鎮冀深趙等州觀察判官
檢校尚書祠部郎中兼侍御史好學能文無所
不覽嘗聘燕帥劉仁恭仁恭命幕吏馬彧以詩
贈祠部頗銜已學祠部即席訓之曰崇霞臺上
神仙客學辨癡龍藝最多盛德好將銀筆述麗
辭堪與雪兒歌一座愛其辭而不能解焉大屈

服事具北夢瑣言次諱昌辭真定府鼓城令琦
之高祖也為政有惠愛而不壽年二十九而亡
生一子諱璆廣晉府永濟令琦之曾祖也永齊
始自蠡吾北原徙鼓城與夫人張氏之喪葬于
趙州贊皇縣太平鄉之北馬村先君令公始葬
永濟與夫人史氏暨琦祖太子中允知康州諱
構與夫人李氏于相州安陽縣之豐安村自先
君之亡諸子幼而孤長而薄宦奔走四方故但
能時奉豐安之祀其於北馬蠡吾之塋則力莫
能及年世殊邈幾于不能辨識嘉祐三年琦始

得北馬之塋一新封植今年春遣男忠彥走蠡
吾又得庶子之塋于北原而先域之西北隅北
距唐河數里之近嘗經霖潦暴漲浸淫及于庶
子之塋且念神宅久安不敢改卜乃於嘉祐八
年七月一日遣孝彥告而啓壙自下以甃實而
上絕沮洳而止衣衾棺柩易而新之然後塞隧
廣封以為萬世之固逮遠祖諸塋率加治葺剪
其荆棘而易以嘉木繚其垣墉而表以高閔既
襄其事也遂直書塋繕之始末而納諸壙中且
復誠于子孫曰夫謹家謀而心不忘于先塋者

孝之大也惟墳墓祭祀之有託故以子孫不絕
爲重琦自志于學每見祖先所爲文字與家世
銘誌則知寶而藏之有遺逸者常精意搜掇未
始少懈時編歲緝寢以大備其所誌先域之所
在雖距今百有餘年必思博訪而得之卒能不
墜先業推及先塋之八世得以歲時奉事少慰
庸嗣之志向若家謀之不謹祖先文字之不傳
雖有孝於祖先之心欲究其宅兆而嚴事之其
可得乎後世子孫不能勤而知此則與夫世之
絕也何異于孫其志之子孫其志之時嘉祐八

年七月十三日記

敘先考令公遺事與尹龍圖書

琦啓今歲始於相州安陽之新安村距祖塋三
十里得地吉以明年二月奉考妣以降諸喪歸
葬焉孝子之心必求世之高才大筆以志不朽
惟先君官氏次敘暨從政之迹則有司封兄先
著行狀及國史所記不敢復述今載考家謀詢
諸老舊得先君之遺事繼而書之以備論譏先
君之先深州博野人也自李唐以來世以官學
知名曾祖昌辭皇任真定府鼓城令祖璆皇任

廣晉府永濟令父構皇任太子中允贈工部尚書去年秋琦忝貳樞筦繼以郊恩得追寵三代永濟府君贈太子太保夫人史氏贈北海郡夫人尚書贈太子太傅夫人李氏贈趙郡太夫人即晉相李公崧之嫡女也先君贈太師夫人羅氏贈仁壽郡太夫人即故大諫延吉之女鄴王之孫也始太師高祖成德軍節度判官檢校太子左庶子兼御史中丞又賓富有文行值唐僖宗朝王室多故遂德游鄉里晦道自養時鎮帥王紹鼎知其名厚加禮辟起參幕之任逮于

崇襲鎮以巢寇亂糾檄隣道圖勤王之舉庶子盡所籌畫卒成其功生二子與諸姪俱有才名更爲中令常山王鎔賓屬故鎔府衣冠之盛冠於一時長子定辭鎮州觀察判官檢校尚書祠部郎中次即鼓城府君也祠部屬文最贍貫達古今嘗聘燕帥劉仁恭與仁恭幕吏馬彘賦詩有擬龍銀筆之句當世推其博覽鼓城早亡貞定亂太僕舉族之趙郡之贊皇篤志嗜學尤工歌詩鎮帥范延光知之歷補深冀屬邑主簿丞又攝真定府衙推後李公崧徐公台符有鄉曲

游學之舊皆歷貴仕以太保未達爲愧方交薦于朝而太保病不起故徐哀而作詩曰穹旻何事教埋玉朋友無由繼斷金足見相得之深也而李公以弟義之女歸于太傅當周晉二朝屢從藩府之辟長於書奏得唐李義山之體嘗爲具清河宰受署之日作條教揭榜以諭縣民其略有枉法擾人之事斷旣不行養民恤物之方疾心是念之語故子孫爲吏祖其廉受之法後徙家相臺開寶末終康州牧太師即其第三子也故爲相州安陽人太師美鬚髯狀貌竒偉立

朝挺特括紳聳仰外實內恕雖家人未嘗見喜愠之色出入衢肆目不安視在相幕時年未壯里人有伺其出戲於衆曰今日得韓公左右顧我當爲爾曹具肴酒其嚴重如此生平不喜任知數與人言必盡出肺腑性至孝自幼孤見事二親有祿以養者則泣然終日痛已無及力紹先業年十九登進士甲科聲稱烜赫仕漸達諸親率均俸周急不間踈近以是家無餘財姑姊數人孀且老悉奉以歸事之甚恭爲其男女婚嫁又與之營薄業使足以濟其終而後已訓諸

子要令自取祿仕屢經恩得任子皆抑而不奏
仁壽或以爲言太師曰兒曹有官在身便謂榮
官可不勞而得廢學矣俟其藝業有所取奏之
何晚故身歿之後三子皆白丁法掾兄用遺奏
始得出身凡莅官大抵以愛利爲本奉身廉約
於民無毫髮之擾所去人思之罷泉南行次建
州傳舍而終泉人聞之罷市奔赴慟泣於靈所
競爲佛事以報焉公早以方正才敏爲神宗所
知亟被柬擢留計省凡八任不令補外數欲大
用爲忌者所抑而止至景德祥符間趣向寢與

時肯又任直與當權者不合遂守道平進無所
屈撓以至于亡小子罪釁至重幼失所天尚不
能記顏面之髣髴治行之美蓋十不得其一二
又先君章疏文集先爲河陽法掾兄所掌及物
故嫂辛氏盡攜以歸其家後失之不復得故紀
述之際實多漏略甚可痛也今遠日有期矣思
老於文而相知深者無出師魯是以不遠千里
遣門人楊生奉書請銘惟賢者鑒此勤懇毋讓

太夫人胡氏墓誌銘

慶曆五年二月二十三日琦奉皇考太師皇妣

仁壽郡太夫人歸厝於相州安陽縣之新安村以所生大寧郡太夫人侍葬焉棺槨之制率用降等安神之次却而不齊示不敢瀆也夫禮非天降地出本於情而已矣今夫人從太師於此域所以慰孝心而稱人情也夫人姓胡氏其先蜀郡成都人曾高以來世籍富貴豪於西土父覺始仕孟氏名在朝籍乾德三年太祖平兩川例遣歸闕生夫人於京師久之不得調卒夫人從母李氏適故秦王牙吏王慶王被譴左右皆得罪家族無依遂以夫人歸於太師大人生而

叔明柔德

狀生物隨手萬態如出

歷觀藏典深達義趣口

內傳授教坊人人嚮善太師

上奉仁壽下睦宗媼內外無間言仁壽愛而禮

之相待之意猶姪娣然夫人生二子曰璩曰琦

璩終秘書省著作佐郎仁壽撫之義均所生在

睿稚時夫人或答之仁壽必奔走保救怒終日

不與夫人語琦未成人仁壽已去世天聖五年

春琦始與著作兄同擢進士第仁壽嘗慶當時

爲榮琦初任通判淄州迎夫人之官下與婦崔氏晨昏侍膳羞奉顏色孝養無違八年夏方受代而夫人宿疾作琦日討方書治湯劑躬自杵藥未嘗委人禱神訪醫卒不獲驗終于五月九日享年六十三自琦登朝暨忝貳樞府夫人凡三追封至大寧郡太夫人嗚呼顧復之恩如天地之大非言可紀也然刻塚徽懿著于亡窮亦孝子之志焉臨葬哀號爲之銘曰哀哀蒼天予有罪兮當天余身何佑余以祿兮反喪余親使余生不得盡其養兮余豈榮乎鼎茵儻親壽之

少延兮敢謂天之不仁惟劬勞之恩罔以報兮余恨終天而不泯

長兄德清尉墓誌銘

太師長子諱球字伯玉少有志氣泛覽經史務究大義不爲章句之學每讀書見古人仗忠義建功立事者必撫卷感慨慕其所爲好擬孟郊作五字句詩意思清遠人多稱詠初以蔭補太廟齋郎選授湖州德清尉適姦奉法如老於從政者太師聞之喜曰此兒他日必爲能吏吾家有望焉太師未亡前數月兄以疾卒時年三十

四娶陳氏生二子暉早亡公彥今爲太常寺太
祝任官以幹潔稱慶曆五年二月二十二日以
兄從太師葬於相州安陽縣新安村西塋之庚
位子暉同葬焉惟兄高識大器宜副先公之言
以興吾宗不幸初仕而夭可謂命矣銘曰人無
壽夭貴乎嗣續之賢兄今有子矣失何恨焉

二兄監簿以下墓誌銘

太師第二子諱瑄字仲瑜性謹厚好學不雜交
游以蔭授將作監主簿自太師之亡兄爲長事
母仁壽郡太夫人盡孝治家有法宗族間

憚之仁壽久寓居京師欲徙家于許兄往營其
事過許田縣有河之石橋遇水暴漲溺卒時年
二十七太師第四子諱琬字叔寶美姿儀器度
淹雅以太師遺奏賜同學究出身選授孟州司
法參軍幼能爲文章方刻意自奮欲決取科第
到官纔數月以疾卒時年二十七娶辛氏生一
女適楚州山陽縣主簿張誥太師第三子司封
之長子名景融字晦之生而穎悟屬文甚工琦
常愛之謂必能紹立門戶初用司封兄蔭補郊
社齋郎琦任樞密直學士遇乾元節奏授將

監主簿後從琦之涇州得暴疾數日而卒時年
十七慶曆五年二月二十二日琦奉考妣歸葬
於相州安陽縣之新安村葬師云司法兄無後
監簿兄與景融未娶而亡宜同葬遂從其言葬
於東塋之庚位監簿兄之靈居南爲上司法兄
次之景融又次之銘曰有才而未試早夭而無
子此世之人共哀矧宗族之哀

三兄司封行狀

公諱琚字子溫相州安陽人自唐以來家世衣
著名河朔曾祖譽皇任廣晉府永濟令贈太

子太保祖讚皇任太子中允贈太子太傅
華皇任右諫議大夫贈太師公即太師之第二
子也資性聰警幼而能文太師以其異於諸兒
尤愛之每有著撰即召令報筆口授之繇是盡
得爲文之體初以父任試將作監主簿大中祥
符六年調補饒州鄱陽尉非其好也次年遇秋
賦乃求鑠廳應進士舉時郡守江公嗣宗之
知名召公詣府使獨登郡閣出鴻鴈來賓賦題
以試之公杼思少選援筆立就詞致清麗深得
唐賢之格江太奇之即時薦送江左士人往往

書其賦於屏幃闥而目公爲韓鴻鴈其愛賞如此八年春登進士乙科授太常寺奉禮郎知南府永寧縣政爲畿邑之最府尹王嗣宗強少許可獨以公爲能表薦之就移通判廣信丁母仁壽太夫人憂去職服除通判趙州改祿寺丞今上即位遷祕書省祕書郎天聖避親嫌移通判棣州公素以文自高雖精事而筆研不廢二年代歸即以所業數十御執政多稱之卒以孤進不遂試與今公偕同得記姓名出通判虔州虔民輕

至有害已子而誣人者吏稍不審辨率多枉誤時郡守集賢潘公汝士卒官公權郡踰年大小之獄必精心推治盡得其情境內以爲不冤初公在趙州佐武吏獨尚平恕吏民皆得被其惠故曹公利用稔聞鄉人之論心善之會群牧判官缺薦公堪其任四年春召還充職賜緋衣銀魚是年秋差赴太常寺試舉人較天府國庠取士爲最精朝論多之文節張公知白素賞公才又愛其治行書公姓名實佩囊中數欲引用復遺公紙數十番促令上所業公不得已再以文

奏御書聞而文節薨遂不報後曹公被責公坐
爲其所舉出通判濠州明道元年歸闕遷太常
博士知黃州以恩改屯田員外郎景祐元年春
就移梓州路提點刑獄公辭改知澤州轉都官
員外郎二年移提點京西路刑獄公事時西京
白馬天宮寺僧競營浮屠倚權臣倡導以大其
事於是洛中暨隣道諸郡自官吏而下皆被裒
取民里甚擾公抗疏罷之三年改提點福建路
刑獄公事未幾移廣南西路轉運使是歲安化
州蠻人叛殺宜州守王世寧朝廷遣將臣益兵

進討委公經畫公乃上言安化二州依負險
猶穴鼠然急之則竄伏不可得緩之則伺隙而
出飛標藥弩發必中人徒跣趨叢薄中若履平
地又水土毒惡戍兵久留死者十六七願以天
兵逼其巢穴俟其畏威請罪因而撫之漸募土
兵屯備要害然後罷遣戍卒宜不能復叛詔如
公策一道以安時朝廷亟加兵廣西諸郡遐陋
素不備兵費公度官用以餉其羸量民力以貸
其薄故糧道以濟而遠人不勞朝廷嘉之在職
遷司封員外郎代歸面賜金紫判三司都理欠

憑由司康定元年夏出爲兩浙轉運使次潤州
以疾亡公娶李氏乃故國子博士忠恕之女生
於名族克謹婦道公未亡前以苦風痺感公之
逝踰月亦不起生四男四女長男景融將作監
主簿性和雅善屬文後公三歲而卒次方彥試
祕書省校書郎次直彥孝彥並太廟齋郎長女
適著作佐郎葉仲舒次女在室亡次適左侍禁
曾測次適殿中丞范寬之公仁孝純直出於天
性介靜寡合恬於進取自父兄亡即主家事撫
弟姪唯恐有傷薄官中竭俸資贍怡然

時爲文酒之會以相娛樂或作事有不如意者
亦婉辭誨勗不忍加一惡言弟姪感其義競自
樹立在官清節凜然秋毫無私至于夙夜兢畏
遇自繩檢世稱廉吏者鮮能及之爲政簡而愛
人故所至稱治前後建白革弊益時之事多見
採納公官止六品於式不預史氏之載惟葬有
銘所以著行實於不朽以公之德之美而賦命
不承位未充量紀述之際諒無愧辭謹狀

五兄著作墓誌銘

太師第五子諱璩字子徽於琦同母兄也天聖

五年春擢進士高第初任安化軍節度推官丁
母太寧郡太夫人憂去官服除再調權舒州團
練判官又爲建昌軍判官慶曆元年秋吏部奏
課最授祕書省著作佐郎知壽州安豐縣事二
年二月十九日以疾卒時年四十一娶陳氏勲
臣之裔雅有婦德生一子正彥將作監主簿四
女並在室兄少負雋氣聰穎過人每讀書必泯
絕外慮雖左右囁然如不聞以是經史百家之
言一覽即能誦記尤通左氏春秋爲文敏速初
若不甚經心及成詞壯理備雖他人精思有不

及者性純易襟量夷坦遇人無賢愚一以誠接
之曠然不知世路有風波陷穽之險有時意樂
閑放與朋友相過從酣笑杯酒間或逾旬興未
盡不止及刻志於學則下帷閉戶以墳典自環
雖在寢食未嘗捨卷其真率如此當官治簿書
斷獄訟發決如神所至以明幹稱然志氣磊落
事上官未嘗降禮以強顏曲意求薦舉爲大恥
故久滯賓幕兄亦壽才越強仕不得盡其器能
嗟乎二年間司封兄與兄相繼而亡唯小子獨
承門戶之重雖叨竊寵任顧先生行無一存者

復何榮哉但諸孤滿目每一念至不覺涕之無
從也今奉考妣歸厝故里以兄從葬於東塋之
壬位永懷友愛哀不自勝銘曰天生雋奇當有
所施才優宦薄惟世孔悲復奪之壽天豈無知
慶有餘者嗣人是宜

新婦賈氏墓誌銘

惟賈氏故韓城令符荷之女年二十為韓公彥
之婦中無遂內有助未踰年疾物故慶曆五年
二月二十二日安陽水冶獲安厝從祖舅太師
之葬也東塋丙位實其墓

誌石蓋記

琦始謀奉考妣歸葬相州不敢遠視塋而忘故
里也得釋保聰善地理學遣姪公彥同往視焉
不旬日得地於安陽縣新安村之水冶為吉乃
作東西二塋塋各三穴西塋之壬安皇考太師
皇妣仁壽郡太夫人所生太寧郡太夫人庚安
太師長子德清尉子暉從葬焉丙安太師第三
子司封夫人壽春縣君李氏長女未笄而亡從
葬焉東塋之庚安太師第二子監簿景融從葬焉壬安太
州司法司封之長子監簿景融從葬焉壬安太

師第五子著作丙安德清長子太常寺太祝公
彥妻賈氏以慶曆五年二月二十二日掩壙諸
塋各有銘誌今但述安神之次敘刻于太師誌
石之蓋以永終古子樞密副使光祿大夫右諫
議大夫上柱國琦謹記

姪太常寺太祝直彥墓誌銘

三兄司封第三子曰直彥字師黯幼聰悟喜學
七歲能屬文語言動作如老成者兄以是特愛
之異於諸子十一歲而兄亡嫂李氏繼卒予
而教之直彥能稟訓自飭道業日修爲人和謹

通明周悉時事內奉親族外接賓友無不得其
歡心者予常謂兄清德純孝爲世表式而天不
大畀其位又奪其年則其慶之所延宜直彥得
之以興吾宗故心常泰然知門戶之可屬也直
彥始以兄蔭補太廟齋郎慶曆七年予用南郊
恩例遷將作監簿皇祐二年大饗明堂遷太常
寺太祝五年春舉進士及第簽署信陽軍判官
聽公事時予爲帥并門直彥歸待信陽闕明年
春以家事如京師得瘡胗醫誤而早下之毒氣
內畜不得發三月二十日卒於其姊壻祕書丞

張詵之家年二十五余既以吾門屬直彥又痛其不得在家而亡悲哀之積乃得大疾幾于不可治嗚呼余之所愛豈私于直彥哉蓋以世家子類多不歷艱難習尚驕佚不知其先之所得之勤忘學肆侈自底不令使生者族屬不能合死者墳墓無所託幸而有一賢子孫出則其尊親之心其愛何如也今吾子姪輩皆恥以門籍之蔭思自樹立苟能力行力學動以不墜先業爲意則余之所愛猶愛直彥之公也豈私乎哉妻崔氏余妻兄大理寺丞勉之女工部侍郎

承順正潔得其家法三子挹試祕書省校

郎次高紹並幼一女直彥訃至踰月而卒司

到兄諱琚嫂李氏壽春縣君以嘉祐二年十月

十八日葬直彥於相州安陽縣新安村之水沿

先祖令公之墓次東坐之辛穴銘曰噫嘻乎夫

士族之興也不繫乎子孫之賢何賢而多天兮

不肖之比肩謂祖宗德薄而致兮則吾家之不

然既富爾之德而嗇其壽兮是三子者宜昌大

而克傳若然則善惡之報人猶有望于天焉

錄夫人崔氏事迹與崔殿丞請爲行狀

夫人姓崔氏其先姜姓齊穆伯食采於崔因以
命氏自穆伯二十九世而至漢泉萊侯業居東
武城為清河郡自業二十世而至後魏七兵尚
書休始號大房自休十四世而至石晉左拾遺
周度佐兗州慕容彥超慕彥超叛死節周度贈
祕書少監即夫人之曾祖也祖汝礪皇任左班
殿直贈兵部侍郎父立皇任工部侍郎致仕直
道能政措紳宗仰崔氏自唐以來為衣冠甲族
與盧李鄭數家相為婚姻它族不得預夫人曾
祖母祖母猶皆盧李二姓故世高其門風夫人

侍良之第五女示靜

幼有成德女功

事莫不臻極年二十一

而歸于韓氏逮事琦所

生秦國太夫人胡氏能

蓋婦道秦國寢疾躬侍

湯劑夙夜不懈及其亡

也號慕以奉几筵訖于

終喪無一不如禮者韓

氏內外族屬多而素貧

孤遺者眾夫人天性仁

賢義隆孝睦極意存育

常若不及親為婚娶者

幾三十人雖罄竭家貲

而不顧也其於待已則

躬履儉約恬然無欲

用粗備不求過飾琦未

參侍從之前俸尚薄必

官京師夫人雖一釵之

微未嘗在首時質繒錢

以濟諸親琦每賑給宗族暨周人之急夫人必欣然贊助惟恐不充此天下之共知而婦人之尤難也又治家嚴明事無細大處治條理皆有法度閨門之內猶官府然故琦略無私室之慮而得專心公家者夫人之力也凡歲時祖宗之祀夫人必先朝嚴辨繼悉精至酌薦之日禮極恭恪如是者三十餘年六親師服之父母之亡摧毀過甚幾不能生以至圖家嚴事至於終身與諸姊諸弟友愛敦篤情禮兼至雖在顛沛未嘗忘也

縣君進安康郡君安康

繼女二郡夫人安國夫人嘉祐七年春末背脅痛臥起為梗醫者言氣血凝澁下之當故時以藥宣治之而不能去涉夏秋之交變為世注日以沉劇九月三日而亡上與中宮聞之皆遣尚宮臨奠賻贈加等夫人介謹純直待人以至誠平生無一妄言善書札體法甚老殊無婦人氣格好讀諸史氏書槩知歷代興亡治亂之事時作篇章有理致然以為非婦人之事雖至親不得見也臨事取捨剖斷有剛毅大丈夫所不能為者嘗曰我遇小事則膽薄多驚若處

大事知義所在雖死不怖也平居散施左右必
與下房者均琦嘗怪問謂宜少有差等夫人曰
我性好平不欲使人見有輕重厚薄疾雖久而
視家事不倦待宗親益周琦嘗勸譬之謂非順
養之理乃慨然曰此我平生所存豈至此可變
也唯死然後不能爲也其用心如此三子長忠
彥光祿寺丞次端彥太常寺太祝次良彥祕書
省校書郎早亡五女長不育次適許州司
軍王景脩次二女早夭次尚幼夫人慈愛至厚
行非所生者過於已出嗚呼夫人內行高

如此之著恐雖當世賢婦人少能繼者今取
一月二十九日葬於相州安陽縣豐安村祖塋
之次壙有銘故親筆其大槩以俟實錄焉

姪殿中丞公彥墓誌銘

余長兄湖州德清尉贈光祿寺丞諱球之次子
曰公彥字師道即太子中允贈太師中書令兼
尚書令燕國公諱之曾孫右諫議大夫贈太
師中書令兼尚書令魏國公諱國華之孫母靈
壽縣太君陳氏公彥幼失二親祖母魏國太夫
人羅氏鞠之如子而余三兄司封又愛而教育

之與公彥同年生同時就學公彥始讀書爲
辭章甚敏而幹家事尤長故司封兄專以門內
之務責之公彥所委必集嘗曰我所以能辦者
無他勤而不私爾移我此心以治吏事宜無甚
難者然用是頗廢學天聖中有詔少卿監以上
歿於五經郊恩者許錄其子孫一人公彥應得
補郊社齋郎調南儀州岑溪主簿岑溪風土之
惡在嶺南爲第一而公彥殊不以爲憂但日與
其民辨訟之枉直而平其疾苦逮滿歲全家安
然以歸再調楚州寶應縣主簿考滿補開封縣

永康定元年秋余任陝西經略安撫副使奏公
彥授將作監主簿簽署保靜軍節度判官事宿
櫪汴渠之衝事甚劇公彥悉心贊畫其今翰林
學士王公素知其才屢稱薦之慶曆三年夏就
差知汝州葉縣事轉太常寺太祝俄改知磁州
武安縣事縣跨西山盜賊之藪公彥乃籍邑之
射生戶者使各占其地遇盜發則與當捕之吏
共捕之條其賞罰示以必行盜奔它境六年秋
改大理評事七年秋差通判懷州事次歲河朔
雨水害稼民大飢公彥與其守夙夜經慮誘郡

豪出粟極力賑恤全活甚衆時朝廷轉江淮米百萬斛由黃河下抵衛州分給災傷諸郡公彥被旨與中貴人董其事皆如期以濟皇祐元年改光祿寺丞二年春就移知榮州事明堂恩遷大理寺丞五年冬轉太子右贊善大夫郡有塩井四十餘所昔以歲課之重乃抑鄉民以分主之年祀既遠水泉有盈竭戶力有興替得利之多者或所主之戶富得利之寡者或所主之戶貧故貧者雖歲破家不能償官課而富者日獲其贏以肆兼并宋民苦口之久公彥既至知其敝

曰吾境之民皆王民也柰何使其有幸不幸以至此而有不變之哉乃集其衆使自疏之於是類其井得利之多寡以相附之量其民戶等之高下以相參之民以爲均而課入亦辦轉運使知而保奏之事下三司以爲當朝廷嘉獎歸闕用是升次得知和州事嘉祐元年冬改殿中丞郡有宿寇時發閭里民以爲患公彥乃舉武安制盜之法增損之以令其下訖三歲無盜歸屬朝廷以羸處邊要北道之重通判之任非嘗爲郡者不得預其選公彥以近先域歲時洒掃之

便欣然就之將赴治所而疾作食輒不能下病
日益余度其難治乃泣而諭之曰萬一有不可
諱汝叔在勿以兒女爲慮公彥曰是誠感然兒
女之榮與否公彥莫得而知之矣色殊不動是
夕卒其達性命如此四年正月四日也時年五
十二公彥介直有守性樂儉薄每公退必涉獵
書史間以詩筆自娛齋室凝塵怡怡如也待遇
賓佐稱禮而已不爲廚傳之飾人或譏其太約
公彥曰吾雖起於蔭補當吾祖考之亡諸父未
遂之前家甚窘吾嘗同歷艱苦今幸竊榮祿敢

效世家子之所爲哉雖然尚懼吾子孫不能守
法漸陷奢放以隳吾家聞者嗟服之素曉法令
而用心平恕凡處讞議苟情文相當而上官執
其異見公彥必析理固爭雖死不可奪也少侍
司封兄從官見其清白過謹志師慕之故在官
以潔已爲先閨門肅然雖市物一錢不得不自
民安其無擾去則歌思之公彥始娶賈氏同州
韓城令昌符之女先卒再娶張氏職方郎中文
昌之女封仁壽縣君皆柔順以正克成家道子
四人長曰確試祕書省校書郎次曰愷並早亡

安陽集卷之四十六
次曰恬祕書省校書郎次曰恪尚幼女五人長
適前常州武進尉孫扶次二女早夭次二女並
幼慶曆中余葬先考妣於相州安陽縣新安村
之水冶而賈氏從葬于東塋之丙位嘉祐七年
十一月二十九日因余妻安國夫人崔氏之葬
乃舉公彥之喪納賈氏壙中嗚呼公彥行完于
躬政脩于官吾門之令器也不幸越中年而亡
余且老失其所託可勝其哀哉銘曰噫公彥兮
行廉節勁爲子克家在官能政明而守法當世
誰競怡然處約衆則奚評宜享也豐嗣門之盛

如何始衰遽此不幸夫子言易善兮有慶及繫
辭焉又貴知命慶爲教邪命其默定不然何爲
報之戾哉訴于天兮孰聽

姪孫試祕書省校書郎確墓誌銘

確字百堅余姪殿中丞公彥之長子母仁壽縣
君張氏確性端厚沉敏幼而喜學爲文典瞻有
老成風格慶曆六年夏余以乾元節恩奏確得
試祕書省校書郎嘉祐元年秋應進士舉不利
乃慨然勵志爲學益苦不幸勞而生疾寢以羸
憊卒於三年八月二十六日時年二十一妻孫

氏虞部郎中周之女柔淑有婦德感夫之亡痛悼不已未終喪亦卒生一男曰和孫一女並早夭嗚呼天之肆罰也其甚矣乎使夫妻盛年俱殞而又絕其所繼此行路聞者孰不傷駭則於吾族其哀何如哉七年十一月二十九日因余妻安國夫人崔氏之葬乃於相州安陽縣新安村先塋之東百步得地以葬確孫氏祔焉葬者以爲壬穴云銘曰確生吾門是謂良嗣如何力學遂以勤斃婦執夫喪未終而逝亦嘗生子又不克繼天戕善良酷也如是哀無窮兮葬因以誌

誌

姪孫愷墓誌銘

愷字和仲余姪殿中丞公彥之次子母仁壽縣君張氏愷天性孝謹幼識禮義讀書彊記而善屬文嘉祐三年秋方應進士舉而兄確物故是冬其父病愷躬進藥劑晝夜侍側不解帶者累月及父之亡也哀毀過甚不能自抑既而感疾不可治五年四月二十三日卒時年二十愷之所稟可謂粹美矣使天稍畀以年則其處家也有不順而睦乎其得仕也有不忠而幹乎

柰何乎吾家之不幸而賦命之短也七年十一月二十九日因余妻安國夫人崔氏之葬乃於相州安陽縣新安村先塋東百步之近得地吉用丙穴以葬愷銘曰秀而不實夫子之嗟哀哉愷兮遽如是邪

姪孫四殤墓記

余第四姪大理寺丞正彥生子曰光壽時正彥初授光祿寺丞故以名之余第五姪大理寺丞方彥生子曰盤奴時余自揚州徙知鄆州舟次淮上之磨盤口故以名之余之長子光祿寺丞

是彥生子二人長曰錦孫時余知相州得任故里有畫錦之榮故以名之次曰密孫時余始爲樞密使故以名之是四小孫皆姿狀美秀慧而可愛或僅能行立或未免抱持天何降災遂俱不育嘉祐七年十一月二十九日因余妻安國夫人崔氏之葬乃於相州安陽縣新安村先塋之東百步得地用庚穴而同瘞焉因刻石以誌之叔祖開府儀同三司行刑部尚書同中書門下平章事昭文館大學士監修國史上柱國儀國公韓琦記

三姪孫女墓記

余第二姪殿中丞公彥第二第三女皆生而令
淑年甫及嫁不幸相繼而卒余第五姪大理寺
丞方彥一女曰公娘幼而不育嘉祐七年十一
月二十九日因余妻安國夫人崔氏之葬乃於
相州安陽縣新安村先塋之東得地用外丙穴
以同瘞之從葬師之言也刻石壙中以誌其哀
云叔祖開府儀同三司行刑部尚書同中書門
下平章事昭文館大學士監修國史上柱國儀
國公韓琦記

安陽集卷第四十六

